



U ovom broju:

- ➔ USVOJEN BUDŽET ZA 2022. GODINU
- ➔ REZOLUCIJA O OSUDI NAPADA NA USTAVNO PRAVNI POREDAK DRŽAVE BOSNE I HERCEGOVINE
- ➔ NOVIH 12 MLADIH PODUZETNIKA
- ➔ VODOSNABDIJEVAJNJE
- ➔ IZGRADNJA ŠKOLE U MEDAKOVU
- ➔ DVORANA JELAH
- ➔ STANOVI ZA 21 PORODICU
- ➔ IZBOR SPORTISTE GODINE



OPĆINA TEŠANJ

Trg Alije Izetbegovića 1

www.opcina-tesanj.ba

e-mail: optesanj@bih.net.ba



JAVNI POZIV POTENCIJALNIM KORISNICIMA BESPOVRATNIH SREDSTAVA ZA MJERU PODRŠKE INVESTICIJAMA ZA RAZVOJ RURALNOG TURIZMA

U okviru projekta EU4AGRI, EU4AGRI-Recovery i EU4 Business Recovery, koje finansira Evropska unija, objavljen je javni poziv vrijedan 3,5 miliona KM za podršku investicijama u ruralni turizam u Bosni i Hercegovini.

Na javni poziv se mogu prijaviti isključivo partnerstva koja čine podnosilac prijave i najmanje dva partnera. Podnosilac prijave može biti jedinica lokalne samouprave, preduzeće ili obrt koji se bavi pružanjem turističkih usluga i /ili proizvoda, javna ustanova i organizacija koja upravlja zaštićenim prirodnim područjima u BiH, nevladina organizacija i udruženje sa iskustvom u vođenju projekata razvoja i promocije turističke ponude.

Krajnji rok za podnošenje prijava je 07. mart 2022. godine.

Javni poziv sa pratećom dokumentacijom možete pogledati na stranici www.eu4agri.ba



Izdaje: **OPĆINA TEŠANJ**

Redakcija:

Edina Kadušić, Samir Brka,
Kanita Gredelj i Bahrudin Nočić.

Glavni i odgovorni urednik:

Edina Kadušić

Adresa Redakcije:

Općina Tešanj, Trg Alije Izetbegovića I
74260 Tešanj

Telefoni: 032 650-341 i 032/650-022 (lokal 107)

Fax: 032/650-220

E-mail: press@opcina-tesanj.ba

Tiraž: 2.000

Štampa: Grafik-komerc Jelah, Tešanj

OBAVIJEST POLJOPRIVREDNICIMA

Obavještavamo sve poljoprivrednike, pravna i fizička lica, upisana u Registar poljoprivrednih gazdinstava i Registar klijenata, da je članom 14. Pravilnika o upisu u Registar propisano da su sva poljoprivredna gazdinstva obavezna do 31.03.2022. godine, izvršiti ažuriranje podataka odnosno prijavu promjena na svom poljoprivrednom gazdinstvu kod općinske službe koja vodi Registar.

Ažuriranje podataka, odnosno upis promjena su dužni izvršiti i klijenti (udruženja, preduzeća, mjesne zajednice i dr.) koji ostvaruju ostale vrste podrški.

Upis u Registar kao i ažuriranje, odnosno prijava promjene podataka u Registru poljoprivrednih gazdinstava i Registru klijenata je preduslov za ostvarivanje prava na novčane poticaje poljoprivredi u 2022. godini.

Pri dolasku u zgradu Općine Tešanj potrebno je pridržavati se propisanih epidemioloških mjera i obavezno nositi zaštitnu masku, a svoj dolazak najaviti pozivom na broj 032 653 915, kontakt osoba Tamara Turkić.



REZOLUCIJU O OSUDI NAPADA NA USTAVNO PRAVNI POREDAK DRŽAVE BOSNE I HERCEGOVINE

- **Odlučni** u zaštiti ustavnopravnog poretka Bosne i Hercegovine i provođenju Općeg okvirnog sporazuma za mir u Bosni i Hercegovini, teritorijalnog integriteta i suvereniteta naše domovine,
- **Upozoravajući** na ugrožavanje stabilnosti i mira, te druge štetne posljedice koje trpe građani Bosne i Hercegovine, zbog postupaka institucija i određenih političkih predstavnika entiteta Republika Srpska,
- **Ubijedeni** da je politička stabilnost i ekonomski prosperitet Bosne i Hercegovine, interes svih naroda i građana Bosne i Hercegovine,
- **Uvjereni** da zbog trenutne političke situacije imamo izostanak napretka u približavanju EU i NATO integracijama, te
- **Svjесni** da politička kriza i blokada institucija negativno utiču na ekonomski rast, razvoj investicija, na migracije, negativan prirodni priraštaj i dr.;

Iznova potvrđujemo svoje stavove:

1. **Općinsko vijeće potvrđuje** predanost i posvećenost izgradnji Bosne i Hercegovine, kao suverene, međunarodno priznate i nezavisne države ravnopravnih naroda i građana. Budućnost općine Tešanj i njenih građana vidimo i želimo u takvom ambijentu.
2. **Općinsko vijeće Tešanj poziva** sve institucije u Bosni i Hercegovini na poštivanje međunarodnog prava, ustavnog poretka Bosne i Hercegovine, te punu zaštitu suvereniteta i teritorijalnog integriteta Bosne i Hercegovine.
3. **Općinsko vijeće Tešanj osuđuje** blokadu rada institucija države Bosne i Hercegovine, kao i zaključke i Deklaraciju o ustavnim principima, koji su usvojeni na sjednicama Narodne Skupštine RS, jer predstavljaju direktni napad na ustavni poredak Bosne i Hercegovine. Osuđujemo svaki oblik šovinizma, fašizma i sećenionizma, kao i pokušaje osporavanja civilizacijskih normi.
4. **Općinsko vijeće Tešanj podržava** izmjene Izbornog zakona koje će omogućiti veću funkcionalnost svih institucija i političkog sistema, te transparentnost izbornog procesa, pri čemu takve izmjene trebaju izražavati volju naroda i građana, putem političkih subjekata.
5. **Općinsko vijeće Tešanj poziva** Tužilaštvo Bosne i Hercegovine i nadležne institucije da provode sve propise radi zaštite ustavnog poretka Bosne i Hercegovine i procesuiranje počinitelja ovog krivičnog djela.
6. **Općinsko vijeće Tešanj apeluje** na sve političke aktere, koji djeluju u institucijama na različitim nivoima vlasti da daju maksimalan doprinos u prevazilaženju trenutne krize i efikasnom radu institucija.
7. **Općinsko vijeće Tešanj potvrđuje** potrebu za što jasnijim i konkretnijim stavovima i mjerama Visokog predstavnika i Vijeća za implementaciju mira, kao i svih onih koji su garanti Općeg okvirnog sporazuma za mir u Bosni i Hercegovini s ciljem zaustavljanja rušenja ustavnog poretka Bosne i Hercegovine, državnih institucija Bosne i Hercegovine i sprečavanju narušavanja mira i stabilnosti u regionu.



POSJETA MINISTARA ZDK

Ministar za obrazovanje, nauku, kulturu i sport ZDK Spahija Kozlić i Ministar za poljoprivredu, šumarstvo i vodoprivredu ZDK Mirsad Hadžić posjetili su općinu Tešanj gdje su se susreli sa Općinskim načelnikom Suadom Huskićem i pomoćnicom načelnika Azrom Muslijom.

Cilj posjete je potpisivanje Ugovora o prenosu sredstava u svrhu sufinansiranja novog školskog objekta JU Osnovne škole "9. septembar" Medakovo u ukupnom iznosu od 200.000,00 KM odobrenih Odlukom Vlade Zeničko-dobojskog kantona. Sredstva će biti implementirana u 2022. godini u III fazi gradnje.

Također, potpisan je Sporazum o zajedničkom učešću u realizaciji projekta iz Programa utroška sredstava vodnih naknada za 2021. godinu – Finansiranje izgradnje ili rekonstrukcije vodnih objekata od značaja za jedinice lokalne samouprave. Općina Tešanj preuzima obavezu pripreme tenderske dokumentacije, definisanju i objavljivanju obavještenja o nabavci. Ovo se odnosi na projekte „Izgradnja bunara PEB-3, Jelah Polje“ i „Rekonstrukcija i dogradnja vodovodne mreže u Jelah Polju, I faza“ za koje je u toku izdavanje odobrenja za građenje. Programom utroška sredstava vodnih naknada za 2021. godinu, za Općinu Tešanj je predijeljen iznos od 298.045,00 KM.

Posjeta ministara nastavljena je posjetom školskim objektima OŠ „I. mart“ Jelah, OŠ „Kulin Ban“ Tešanjka i OŠ „Mustafa Mulić“ Šije, na kojima je u toku implementacija projekta energetske efikasnosti, a koji se realizira u okviru projekta AF BEEF finansiranog iz kredita Svjetske banke. Projekat energetske efikasnosti podrazumijeva rekonstrukciju krova, zamjenu vanjske stolarije, ugradnju toplinske fasade, zamjenu kotlova i prelazak na ekološki prihvatljive energente. Ukupna vrijednost projekta za sve tri škole iznosi 1.200.000,00 KM.



IZRADA PROSTORNOG PLANA OPĆINE TEŠANJ 2020-2040

Predstavnici Zavoda za prostorno planiranje i urbanizam ZDK na čelu sa direktorom Refikom Zekovićem, posjetili su Općinu Tešanj te održali radni sastanak sa Općinskim načelnikom i članovima radnog tima za pripremu dokumentacije za izradu Prostornog plana općine Tešanj 2020-2040.

S obzirom da Prostorni plan spada u razvojne planske dokumente te se karakteriše kao strateški dugoročni planski dokument kojim se definišu osnovna načela planskog uređenja prostora, ciljevi prostornog razvoja uređenja kao i zaštita, korištenje i namjena prostora, na sastanku je izvršena prezentacija samo nekoliko oblasti.

Prilikom prezentacije oblasti, a koje se tiču urbanih područja i građevinskih zemljišta izvan urbanih područja, saobraćaja, komunalne infrastrukture, energetske infrastrukture, te vode i prirodnih resursa, svi učesnici su uzeli aktivno učešće u diskusiji, te su tom prilikom definisani naredni koraci i obaveze.



NOVI STANOVNI ZA 21 PORODICU

Krajem novembra, u Tešnju je održana svečanost povodom useljenja korisnika u objekat izgrađen u općini Tešanj u okviru projekta *CEB II – Zatvaranje kolektivnih centara i alternativnih smještaja putem javnih stambenih rješenja*.

Ključeve porodicama uručili su, u ime Ministarstva za ljudska prava i izbjeglice BiH koordinator projekta Zatvaranja kolektivnih centara – CEB II Edina Imamović, Federalni ministar za raseljene osobe i izbjeglice Edin Ramić i Općinski načelnik Suad Huskić.

Ovim projektom ukinuto je naselje Vila i izgrađen je objekat za socijalno stanovanje sa 21 stambenom jedinicom, čime će se završiti priča o nekadašnjim izbjegličkim naseljima i kolektivnim centrima u Tešnju. Kroz Projekat CEB II i izgradnju objekta u Medakovo zbrinut će se 21 porodica, odnosno 67 članova domaćinstva, iz kategorije raseljene osobe.

Općina Tešanj je obezbijedila lokaciju, sve potrebne dozvole, priključke, nadzor nad izvođenjem radova i cjelokupnu koordinaciju, kao i nabavku peći za grijanje i elemenata za kuhinju i video nadzor. Objektom će upravljati Centar za socijalni rad.

Tokom 1992. godine kroz općinu Tešanj je prošlo oko 30 000 izbjeglica iz susjednih općina Teslić i Doboj, ali i Prnjavora, Modriče, Srebrenice. Na području općine Tešanj formirana su dva izbjeglička naselja. Vlastitim sredstvima Općina Tešanj je 2010. godine uspjela zbrinuti ljude i ukloniti kolektivno naselje u Rosuljama. Završetkom ovog objekta, završava se jedna teška priča o osobama koje su bile raseljene i smještene u ostatku izbjegličkog naselja Vila. Sretan sam da smo došli do ovoga. Općina Tešanj je bila podrška u ovom projektu i sufinansirala aktivnosti, rekao je Općinski načelnik Suad Huskić.

Ukupna vrijednost projekta u općini Tešanj iznosila je 1.511.000 KM, od čega je 1.261.000 KM sredstva osigurano iz kredita Razvojne Banke Vijeća Europe i 270.000 KM sredstva koja je osigurala Općina Tešanj. Novoizgrađenu zgradu čini 21 stambena jedinica (2 stana prilagođena za invalide). Stanovi su različite kvadrature u skladu sa brojem članova domaćinstva. Ukupna površina objekta je 1.460 m²

Kada je u pitanju ZDK imamo završen projekat u Maglaju i Zenici, a evo završili smo i ovaj u Tešnju. Pored ovih, imat ćemo još jedan projekat u Zenici, koji će biti i najveći u ZDK. Za te potrebe Vlada FBiH se kreditno zadužila i uloženo je nešto više od osam miliona bez PDV-a. Ovih dana bit će useljena 21 porodica. Ranije smo u Maglaju uselili 15 porodica, u Zenici uradili zgradu sa 62 stana i ostaje još jedna zgrada sa 69 stanova, rekao je Federalni ministar za raseljene osobe i izbjeglice Edin Ramić

Projekat *CEB II – Zatvaranja kolektivnih centara i alternativnih smještaja putem javnih stambenih rješenja* se realizira na području Bosne i Hercegovine za čiju realizaciju su osigurana kreditna sredstva Razvojne banke Vijeća Europe za zatvaranje 121 kolektivnog centra. Za tu namjenu bit će osigurano 2.600 stambenih jedinica u 82 zgrade i objekta u 45 općina i gradova u BiH. Na taj način će biti zatvoreni svi kolektivni centri u RS i više od 76 % na području Federacije Bosne i Hercegovine.



PRIJEM MAJKI KOJE SU RODILE TREĆE DIJETE

Općina Tešanj od 2012. godine u Budžetu planira podršku za treće, četvrto i naredno dijete kroz grant koji se dodjeljuje u vidu novčane pomoći putem Centra za socijalni rad Tešanj. Tim povodom, organizovan je prijem 59 majki koje su u 2021. godini rodile treće, četvrto i naredno dijete.

Još prije desetak godina odlučili smo se da na stimulativan način, odnosno finansijskom podrškom damo do znanja svim budućim roditeljima, svim porodicama da nam je stalo do prirodnog priraštaja. Svjesni smo da općina Tešanj ne može ispraviti različitost dječjeg doplatka po kantonima, ni brojne druge stvari, ali činimo i činit ćemo što je u našoj mogućnosti, rekao je Općinski načelnik Suad Huskić.

Od 2012. godine do danas ukupno je isplaćeno 211.200,00 KM za 617 djece. Osim na ovaj način, Općina Tešanj pruža podršku natalitetu kroz vantjelesnu oplodnju (sufinansiranje), podršku vrtićima, nabavku udžbenika za prve razrede, a tu su i drugi projekti podrške za mlade.



DVANAESTA GODIŠNJICA PET PROJEKTA

U sali Općinskog vijeća Tešanj u utorak, 28. decembra obilježena je dvanaesta godišnjica PET projekta (organizovano sakupljanje, odvoz i zbrinjavanje PET ambalaže sa područja općine Tešanj) i pet godina EE projekta (organizovano sakupljanje, odvoz i zbrinjavanje sitnog elektroničnog i elektronskog otpada).

Prema podacima, koje je predstavio koordinator projekta Adnan Lihić, u 2021. godini sakupljeno je 4.500 kg PET ambalaže, dok je ukupno za dvanaest godina sakupljeno cca 187,5 tona PET ambalaže, a to je cca 3.750.000 PET boca, koja je propisno zbrinuta.

Osim toga, u 2021 godini sakupljeno je cca 2.000 kg EE otpada, dok je ukupno za pet godina sakupljeno cca 10.000 kg EE otpada koji je propisno zbrinut.

Ponosan sam da projekat sakupljanja PET ambalaže realizujemo već dvanaest godina i projekat prikupljanja elektronskog otpada pet godina. Uspjeli smo ustrajati u jednom lijepom, ekološkom, odgovornom i funkcionalnom projektu sa svim školama. Na ovaj način, osim što mijenjamo svijest učenika, ostvarujemo i korist za cijelu lokalnu zajednicu, rekao je Općinski načelnik Suad Huskić.

Nosilac projekata je UG EKO-MLADI, a Općina Tešanj je glavni finansijer projekta. U projektu učestvuju osnovne i srednje škole sa područja općine Tešanj, a partneri su JP RAD d.d. Tešanj i OMORIKA reciklaža doo Doboj.



STUDIJA DUGOROČNOG RJEŠAVANJA VODOSNABDIJEVANJA

Općinski načelnik Suad Huskić i predstavnica Instituta za građevinarstvo IG Banja Luka Mirjana Marčetić krajem decembra potpisali su ugovor za izradu Studije dugoročnog rješavanja vodosnabdijevanja na području općine Tešanj. Vrijednost ugovora je 41.301,00KM.

Radi se o projektu koji je predviđen Strategijom razvoja općine Tešanj. Ovaj projekat će obuhvatiti dosadašnja istraživanja i analize vodosnabdijevanja na području općine Tešanj, te dati odgovore i smjernice za rješavanje vodosnabdijevanja na području općine Tešanj za narednih 30-40 godina.



VODOSNABDIJEVANJE U MZ KALOŠEVIĆ I BOBARE

Završeni su radovi na izgradnji bunara, pumpne stanice i tlačnog voda za MZ Kalošević. Projekat je realizovan u cilju poboljšanja vodosnabdijevanja područja MZ Kalošević i MZ Bobare-Drinčići-Blaževci gdje je planirana izgradnja novog bunara sa lateralnim drenovima, crpna stanica i tlačni cjevovod dužine 290 metara. Tlačni cjevovod spaja novu pumpnu stanicu sa postojećom pumpnom stanicom u MZ Kalošević. Predviđena izdašnost bunara je 4,0 l/sec.

Finansiranje projekta je obezbijedeno iz Programa utroška sredstava vodnih nanada ZDK za 2020. godinu.

Izvođač radova je Konzorcij AB Trans doo Tešanj i Nedjing doo Tešanj. Nadzor je vršila firma INPROS doo Mostar.




U TEŠNJU ROĐENE 624 BEBE U 2021. GODINI

Prema podacima matičnog ureda Općine Tešanj, tokom 2021. godine održano je 373 vjenčanja, u knjigu rođenih je upisano 624 djece, dok je u knjigu umrlih upisano 625 osoba. Država Bosna i Hercegovina bilježi negativan priraštaj (mnogo više umrlih nego rođenih), što u kombinaciji sa migracijama (odlaskom iz BiH) pravi mnogo lošiju sliku.

Općina Tešanj je i u 2021. godini davala doprinos kroz stimulative demografske mjere: Podrška bračnim parovima u vantjelesnoj oplodnji – 52.000 KM, Podrška porodicama (3., 4. i više djece) – 36.000 KM, Podrška dječijim igraonicama/vrtićima – 22.000 KM, Podrška za polazak u školu – 30.000 KM, Podrška za srednje obrazovanje (prevoz) – 32.000 KM, Podrška stipendiranju (različiti nivoi) – 220.000 KM, Podrška pokretanju biznisa za mlade – 80.000 KM, Sport – cca 480.000 KM itd..

U 2020. godini u Tešnju je održano 362 vjenčanja, u knjigu rođenih je upisano 543 djece, dok je u knjigu umrlih upisano 536 osoba.



BUDŽET OPĆINE TEŠANJ ZA 2022. GODINU

Na 12. sjednici Općinskog vijeća Tešanj održanoj 30.12.2021. godine, razmatran je i usvojen Budžet Općine za 2022. godinu.

Usvajanju Budžeta je prethodila izrada Nacrta i provođenje 5 termina usmenog dijela javne rasprave u kojima je učešće uzelo 33 lica, uz dostavu 15 pisanih prijedloga. Rasprava je trajala 30 dana, a evidentirano je ukupno 87 primjedbi i prijedloga, od čega je njih 28 prihvaćeno dijelom ili u cijelosti. Nakon toga, Budžet je u odnosu na Nacrt pretrpio izmjene uz uvećanje od **1.490.000,00 KM**.

Budžet za 2022. godinu iznosi 22.380.000 KM i predstavlja do sada najveći planirani općinski budžet.

Osnovne karakteristika prihodovne strane Budžeta su sljedeće:

- Projiciran je **rast poreznih prihoda koji su vezani za privredne aktivnosti na teritoriji Tešnja**. Ovaj rast je planiran bez uvećanja poreskih stopa, a radi se o porezu na dohodak, porez na imovinu i porezu na promet nepokretnosti. Ovi prihodi bilježe konstantan rast, sukladno privrednom rastu i rastu broja uposlenih, a za narednu godinu je planiran rast od 6,33%.


- S druge strane, **po prvi puta je projiciran pad prihoda od indirektnih poreza (-0,58%), zbog smanjenja učešća naše Općine u raspodjeli prihoda**. Smanjenje je nastalo izmjenom koeficijenta od strane Federalnog ministarstva finansija koje je rađeno na bazi zastarjelih podataka iz 2005. godine. Bez navedene izmjene ova grupa prihoda bi rasla za više od 10%. Na taj način je budžet Općine oštećen za više od 550.000 KM. Zbog toga je Općina pokrenula dvije apelacije pred Ustavnim sudom Federacije BiH, te niz inicijativa za izmjenu Zakona o pripadnosti prihoda u Federaciji BiH.

- Neporezni prihodi su planirani u nešto manjem obimu od prethodne godine, ali na većem nivou od perioda prije pandemije. U odnosu na Budžeta za 2019. godinu sredstva su uvećana za 6,09%.

- Tekući i kapitalni grantovi su planirani na nivou prethodne godine.

- Prijenos akumuliranih prihoda je planiran u većem iznosu od prethodne godine zbog većeg ostvarenja prihoda i kasnih donošenja odluka viših nivoa vlasti u pogledu dodjele grantova, te zbog prijenosa dijela ugovorenih projekata čija realizacija je u toku (dvorana Jelah, škola Medakovo, video nadzor i drugo).

Može se reći da je, nakon perioda krize izazvane pandemijom, došlo do stabilizacije općinskog budžeta sa iskazanim daljim rastom budžetskih prihoda. Kretanje budžetskih prihoda u proteklih 12 godina se može sagledati u okviru slijedećeg pregleda.



Budžet za 2022. godinu se može okarakterisati kao izrazito razvojni, budući da kapitalni dio zajedno sa grantovima koji se dodjeljuju direktno kao poticaj privredi čini 51% Budžeta.

Grant sredstva Općine su dostigla nivo od 5,2 miliona KM, što čini blizu ¼ općinskog Budžeta, a najznačajnija grupa izdvajanja u okviru grantova je vezana za socijalnu zaštitu. **Grantovi socijalne zaštite iznose 1,54 miliona KM, što čini blizu 30% svih grantova.**

Kapitalni dio čini **48%** ukupnog Budžeta i prelazi iznos od 10,7 miliona KM.



Kapitalna ulaganja, između ostalog, obuhvataju izgradnju kanalizacione mreže (2.750.000 KM), vodosnabdijevanje (1.498.000 KM), kapitala ulaganja u mjesnim sredinama (800.000 KM), novu fazu gradnje osnovne škole u Medakovu (440.000 KM), dvorane u Jelahu (400.000 KM), ulaganja u javne ustanove (280.000 KM), učešće u projektima koji se finansiraju iz drugih izvora (560.000 KM), opremanje Civilne zaštite (550.000 KM) i niz drugih aktivnosti.

Visina i struktura prihodovne i rashodovne strane Budžeta je iskazana u sljedećem tabelarnom pregledu:

R. br.	Grupa prihoda i primitaka	Budžet za 2022. godinu	Procent učešća
1	2	3	4
1.a	Direktni porezi	4.114.000	18,38%
1.b	Indirektni porezi	5.478.000	24,48%
2.	Neporezni prihodi	3.091.000	13,81%
3.	Tekući grantovi	1.380.000	6,17%
4.	Kapitalni grantovi i primici	3.967.000	17,73%
5.	Prijenos sredstava	3.100.000	13,85%
6.	Finansiranje	1.250.000	5,59%
SVEGA PRIHODI I PRIMICI		22.380.000	100,00%

R. br.	Grupa rashoda i izdataka	Budžet za 2022. godinu	Procent učešća
1	2	3	4
1.	Sredstva za bruto plaće i naknade	2.992.000	13,37%
2.a.	Direktni materijalni rashodi organa uprave	1.092.000	4,88%
2.b.	Ostale usluge za opštedruštvene potrebe	2.169.000	9,69%
3.	Tekući grantovi, kamate i rezerva	5.199.000	23,23%
4.	Kapitalni grantovi i izdaci	10.732.000	47,95%
5.	Povrat sredstava finansiranja	195.000	0,87%
SVEGA RASHODI I IZDACI		22.380.000	100,00%

Struktura prihodovne i rashodovne strane Budžeta iskazana je u sljedećem grafičkom prikazu:



IZGRADNJA OBJEKTA ŠKOLE U MEDAKOVU

Općinski načelnik Suad Huskić i direktor firme Inter doo Tešanj Dino Ahmić, nakon provedene procedure javne nabavke, potpisali su ugovor za Izgradnju objekta OŠ u Medakovu, faza II.

Vrijednost ugovora je 491.400 KM. Sredstva su obezbijedena kroz Budžet Općine Tešanj u iznosu od 300.000 KM, Vlada FBiH 150.000 KM (po projektu koji je Općina kandidovala) i od Ministarstva obrazovanja ZDK 50.000 KM.

Ovom fazom radova su predviđeni radovi u suterenu (izrada hidro i termo izolacije, betoniranje ploče i zidanje dijela zidova) i radovi u prizemlju (izrada konstrukcije, stubovi, grede, ploča i izolacija nosivih zidova).



GRADNJA SPORTSKE DVORANE U JELAHU, FAZA II

Općinski načelnik Suad Huskić i direktor firme Inter doo Tešanj Dino Ahmić, nakon provedene procedure javne nabavke, potpisali su ugovor za Gradnju sportske dvorane u Jelahu, faza II.

Vrijednost ugovora je 260 910 KM. Ovom fazom radova je predviđeno zidanje i vanjska stolarija, armirano-betonska podna ploča i odvodnja površinskih voda.



SISTEM VIDEO NADZORA

U toku je postavljanje sistema video nadzora u općini Tešanj. Postavljaju se kamere za videonadzor na osam lokacija i vrši se instalacija softvera i centralne upravljačke stanice. Realizacija ovog projekta je pri kraju i očekuje se puštanje sistem u prvoj polovini januara 2022. godine. MUP-a ZE-DO kantona će preuzeti video nadzora na upravljanje i održavanje. Ukupna vrijednost projekta je 214.000,00 KM od čega je 70.000,00 KM donacija nekoliko poslovnih subjekata.

U narednom periodu planirano je proširenje sistema videonadzora i na lokacije koje nisu obuhvaćene prvom fazom izgradnje, a prepoznate su kao značajne za kvalitetniji nadzor teritorije općine Tešanj.



NOVIH 12 MLADIH PODUZETNIKA I 20 RADNIH MJESTA

Općinski načelnik Suad Huskić i 12 mladih poduzetnika potpisali su ugovore o korištenju grant sredstava za podršku poslovnim idejama mladih. Rezultat podrške Općine Tešanj u 2021. godini je podrška i registracija 12 novih poslovnih subjekata sa novih 20 radnih mjesta (14+6), koji su prošli javni poziv.

Općinski načelnik Suad Huskić ovom prilikom je naglasio: „Imamo sve više mladih koji pripremaju kvalitetne poslovne ideje i koji se odlučuju pokrenuti vlastiti biznis. Preko 80% poslovnih subjekata iz našeg programa je nastavilo sa radom nakon prestanka podrške općine. Ovi podaci potvrđuju poslovni ambijent u Tešnju, potvrđuju poduzetnost Tešnjaka i naravno spremnost lokalne zajednice da unaprijedi lokalni ekonomski razvoj“.

Općina Tešanj od 2011. godine podržava poslovne ideje/projekte mladih (do 35 godina) koji imaju ideju i odlučnost da pokrenu vlastiti biznis. Podrška uključuje finansiranje troškova registracije preduzeća, dio bruto plate zaposlenika u periodu do 12 mjeseci, troškove zakupa ili uređenja poslovnog prostora i nabavku opreme. Do sada je 88 registrovanih poslovnih subjekata (72 i dalje posluje), 100 radnih mjesta finansiranih od strane Općine Tešanj, te 80 dodatnih radnih mjesta koji su kreirali sami poduzetnici. Kvalitet poslovnih ideja koje su kandidovane na javni poziv, ocjenjuje radni tim imenovan od osoba koje su duži niz godina uspješni privrednici. Ukupna izdvojena sredstva u deset godina su oko 700.000 KM.

Mladi su se zahvalili na podršci i potvrdili odlučnost da budu dio uspješne poslovne zajednice. Načelnik Huskić je čestitajući novim privrednicima podsjetio je da je općina Tešanj, prva u Bosni i Hercegovini pokrenula ovakav projekat kao dio Strategije podrške mladim ljudima, a da danas slične projekte imaju brojne općine u Bosni i Hercegovini.

Ugovore su danas potpisali: Zanina Beširević (Pekoteka), Ramo Hasanabašić (Proizvodnja dekorativnog kamena), Seid Jusić (Proizvodnja karoserija), Amra Husejnović Matoruga (Proizvodnja metalnih proizvoda), Benjamin Mehić (Proizvodnja ventilacionih Sistema), Kenan Balić (Proizvodnja povrća), Nedžad Katica (Automehaničar), Mujo Turkeš (Autolakirer), Amir Alibalić (Instalacija centralnog grijanja), Amar Ljevaković (Stomatološka ordinacija), Armin Hajrić (Transport robe) i Faris Mehuljić (Autoškola).

Vrijednost potpisanih ugovora je 75.000,00 KM.



REALIZACIJA AKTIVNOSTI IZ GENDER AKCIONOG PLANA (2021.-2023.)

Općina Tešanj je u saradnji sa razvojnim projektom UNDP-a izradila Gender akcioni plan općine Tešanj, koji je Općinsko vijeće Tešanj usvojilo u januaru 2021. godine. Nakon usvajanja dokumenta imenovan je Tim, koji je bio odgovoran za realizaciju.



Akcionim planom su definisana četiri strateška cilja koja treba realizovati kroz 32 aktivnosti (za 2021., 2022. i 2023. godinu). U toku 2021. godine realizovano je 19 aktivnosti (iz cijelog plana) ili 60 %, započeta je realizacija na 9 ili 28 % aktivnosti čija realizacija se očekuje u prvoj polovini 2022. godine, dok se za 4 ili 12,5 % aktivnosti planira realizacija u 2022. i 2023. godini. Najveći dio planiranih aktivnosti realizovan je kroz finansiranje iz vanjskih izvora, ne Budžetom općine Tešanj.

Tokom godine u aktivnostima na realizaciji Gender akcionog plana učestvovalo je cca 3500 osoba, kroz edukacije, radionice ili konkretne aktivnosti. Nastavak aktivnosti je planiran i u 2022. godini, sa kvartalnim izvještavanjem Općinskog načelnika i menadžment tima.

REALIZOVAN PLAN JAČANJA INTEGRITETA 2021

Jačanje integriteta u Općini Tešanj znači unaprijeđenje znanja i izgradnju kapaciteta uprave u pogledu povećane odgovornosti i transparentnosti u radu, te jačanje ukupnih kapaciteta za prevenciju korupcije kroz provođenje Plana integriteta. Akcioni plan za 2021. godinu nastao je u okviru MEG projekta krajem 2020. godine a na osnovu usvojenog Plana integriteta Općine iz 2016. godine.



Na realizaciji 30 mjera i aktivnosti radili su posebni timovi općinske uprave, a rezultat je između ostalog izrada novih ili ažuriranje postojećih dokumenata kao što su Smjernice za primjenu etičkog kodeksa i kodeksa ponašanja, Izjava o nultoj toleranciji prema djelima mita i korupcije, Uputstvo o postupku registracije poklona, Uputstvo o prijavljivanju korupcije, Klauzula o korupciji u ugovorima o javnim nabavkama, Klauzula o korupciji u ugovorima sa NVO,

Pravilnik o izboru, radu i vrednovanju komisija i radnih tijela, Smjernica o izbjegavanju sukob interesa u komisijama i radnim tijelima, idr.

Aktivnosti će se nastaviti i u 2022. godini. Akcioni plan će sadržavati, osim četiri započete a nedovršene aktivnosti iz prethodne godine, i preporuke za poboljšanja koje će proisteci iz UNDP-ovog projekta *Jačanje integriteta i transparentnosti u javnom sektoru* koji je upravo u toku i koji se završava krajem marta ove godine.

ZAVRŠEN 7. TURNIR MJESNIH ZAJEDNICA

U Sportskoj dvorani u Tešnju, u nedjelju, 9. januara 2022. godine održana je završnica 7. turnira mjesnih zajednica općine Tešanj u malom nogometu, streljaštvu i stonom tenisu.

Na ovogodišnjem turniru učestvovalo je preko 300 sportista sa područja općine Tešanj. Turnir organizuje JU Sportsko-rekreacioni centar Tešanj, uz finansijsku podršku Općine Tešanj. Detaljnije možete pogledati dvorana-tesanj.com



IZBOR SPORTISTE GODINE OPĆINE TEŠANJ 2021

Sportski savez općine Tešanj je u okviru manifestacije Dani grada Tešnja 2021 organizovao Izbor sportiste godine općine Tešanj 2021. Manifestacija je održana u četvrtak, 23.12.2021. godine u velikoj sali Centra za kulturu i obrazovanje Tešanj, sa početkom u 18:00 sati.

Uz prigodan prateći program i ugodnu atmosferu, proglašeni su i nagrađeni najuspješniji sportisti i sportski kolektivi općine Tešanj.

Manifestaciju je otvorio predsjednik Sportskog saveza Adnan Alić koji je svima poželio dobrodošlicu na manifestaciju, a prisutnima se prigodnim govorom obratio i Općinski načelnik Suad Huskić.



Spisak najuspješnijih sportista općine Tešanj za 2021. godinu možete pogledati na www.sportskisaveztesanj.ba

ODRŽANA 15. MEĐUNARODNA IZLOŽBA SITNIH ŽIVOTINJA

Udruženje za uzgoj i zaštitu sitnih životinja iz Tešnja organizovalo je 15. međunarodnu i 21. međugradsku izložbu sitnih životinja. Stotinu izlagača iz pet zemalja regiona je izložilo više od hiljadu eksponata golubova, ali i peradi, kunića, ukrasnih ptica i akvarijskih ribica.

I ove godine smo ponovo, bez obzira na izuzetno teško vrijeme pandemije i sve ostalo, napravili, mogu slobodno reći, najbolju i najkvalitetniju izložbu u BiH. Imamo goste, imamo izlagače, imamo kvalitetne eksponate i raznovrsnost što je najvažnije, rekao je Edin Jabandžić, predsjednik Udruženja za uzgoj i zaštitu sitnih životinja Tešanj.



Podrška Općine za organizaciju ovakvih sajmova nije samo verbalna. Udruženje se, kao i sva druga, javlja na javne pozive koje mi raspisujemo krajem jedne i početkom druge kalendarske godine i ovaj projekat je dobio podršku, rekao je Općinski načelnik Suad Huskić.

U Tešnju je od 2008. godine smješteno i sjedište državnog Saveza BiH za uzgoj i zaštitu sitnih životinja.



U cilju kontinuiranog praćenja zagađenosti zraka, a na inicijativu Općine Tešanj, Ministarstvo za [prostorno uređenje, promet i komunikacije i zaštitu okoline](#) ZDK u saradnji sa Metalurškim institutom „Kemal Kapetanović“ Zenica, nabavilo je i instaliralo stacionarnu stanicu za mjerenje zagađenosti zraka koja je postavljena na području općine Tešanj, na lokaciji Vatrogasnog doma i koja je počela sa radom 01.01.2021. godine. Instaliranje ove mjerne stanice predstavlja kontinuirano praćenje zagađenosti zraka na području općine Tešanj. Putem ove stanice se vrši mjerenje polutanata SO_2 , N_x , PM_{10} , O_3 i meteo podaci uz mogućnost instaliranja i drugih senzora za mjerenje zagađenosti zraka. U 2021. Godini 3 puta su prekoračene granične vrijednosti za satni prosjek sumpor dioksida ($SO_2 > 350 \text{ g/m}^3$) i 3 puta prekoračene granične vrijednosti za dnevni prosjek ($SO_2 > 125 \text{ g/m}^3$). Za čestice PM_{10} 36 puta su prekoračene granične vrijednosti za dnevni prosjek ($PM_{10} > 50 \text{ g/m}^3$), a za dušični dioksid 1 puta je prekoračena granična vrijednosti za satni prosjek ($NO_2 > 200 \text{ g/m}^3$).

Tokom 2021. godine nastavljeno je i periodično mjesečno mjerenje zagađenosti zraka na području općine Tešanj. Mjerenje je vršeno u periodu novembar-decembar putem mobilne stanice zagađenosti zraka na području Medakova. Putem navedene mobilne stanice osigurani su podaci sa lokacije izgradnje autoputa kroz općinu Tešanj, koji će se komparirati sa podacima koji budu dostupni nakon izgradnje istog, a sa ciljem utvrđivanja uticaja na kvalitet zraka. Iz istog razloga se provode aktivnosti i na području Karadaglija

PREVENTIVNE MJERE ZAŠTITE I SPAŠAVANJA U 2021. GODINI



Sanacija klizišta i odrona na području općine Tešanj u 2021. godini realizovana je u cilju provođenja preventivnih mjera na sprječavanju širenja postojećih i nastanka novih klizišta. Kao posljedica aktivnosti zemljišta zabilježeno je 6 novih klizišta, pa se tako u Katastru klizišta vodi 352 klizišta/odrona. Sanirano je 6 klizišta i 2 odrona. Isti su urađeni u ukupnom iznosu od 26.335,43 KM. Trenutan broj saniranih klizišta/odrona je 194, a broj nesansiranih je 158. Sanirana klizišta/odroni (188) ujedno su predstavljala visoki i srednji stepen ugroženosti, dok preostala nesansirana klizišta (158) čine klizišta sa niskim stepenom ugroženosti.

Provođenje preventivnih mjera zaštite od poplava tokom 2021. godine realizovano je u skladu sa Planom mjera zaštite od poplava i u skladu sa nastalim posljedicama usljed poplava. Aktivnosti su vođene u MZ Miljanovci-

Lončari, MZ Novo Selo, MZ Dobropolje-Mekiš, MZ Bukva (Industrijska zona), MZ Vukovo, MZ Bobare-Drinčići-Blaževci, MZ Novi Miljanovci, MZ Piljužići i MZ Jelah. Provođenje mjera se odnosilo na čišćenje, produbljivanje i uređenje vodotoka, te izgradnju obaloutvrda na mjestima koja predstavljaju prijetnju dalje erozije obala i zemljišta. Očišćeno je 4.115 metara vodotoka i uređeno 80 metara cjevovoda. Za realizaciju navedenih aktivnosti kroz preventivne mjere utrošeno je 59.143,16 KM.

Što se tiče provođenja preventivnih mjera zaštite od neekplodiranih ubojnih sredstava (NUS), u toku 2021. godine Služba civilne zaštite zaprimila je 16 prijava pronalaska NUS-a. Sva prijavljena NUS-a su u skladu sa procedurama uklonjena i uništena u saradnji sa timovima za uklanjanje neekplodiranih ubojnih sredstava Federalne uprave civilne zaštite.

PANDEMIJA COVID-19

U 2021. godini aktivnosti na utvrđivanju i provođenju mjera na suzbijanju virusa COVID-19 provodio je Krizni štab Federalnog ministarstva zdravstva i Krizni štab ministarstava zdravstva ZDK, a konačne odluke je donosila Vlada FBiH i Vlada ZDK u skladu sa epidemiološkom situacijom. Općina Tešanj u ovom slučaju je provodila utvrđene mjere u okvirima propisanih mjera viših organa vlasti, obzirom da nije proglašavano stanje nesreće, što bi iziskivalo angažovanje Štaba CZ i donošenje odluka i naredbi iz svoje nadležnosti. Većinu aktivnosti su vodile zdravstvene institucije na području općine Tešanj uz aktivnosti inspekcijskih organa Općine Tešanj. Od strane inspekcije Općine Tešanj, za vrijeme trajanja određenih mjera u 2021. godini kontrolisan je 41 objekat, što je imalo za cilj utvrđivanje provođenja donesenih mjera u pravnim i fizičkim licima na području općine. Nakon popuštanja mjera, kroz redovne inspekcijske nadzore davate su preporuke koje su se odnosile i na COVID-19. Pored toga izdato je 4.285 rješenja koja su se odnosila na provođenje samoizolacije u skladu sa zahtjevom Higijensko-epidemiološke službe.

Prema evidenciji testiranih i oboljelih (podaci preuzimani svakodnevno od Doma zdravlja Tešanj) u 2021. godini Dom zdravlja Tešanj je u saradnji sa Općom bolnicom Tešanj testirao 7.761 pacijenta, od čega je kod 1.830 utvrđeno prisustvo virusa COVID-19.

U cilju adekvatnog informisanja građana o aktivnostima koje se provode, preduzetim mjerama, naredbama, preporukama i uputstvima, a koji se tiču pandemije Covid-19, Općina Tešanj je na svojoj službenoj web stranici uradila pristupni baner (COVID-19), gdje se mogu pratiti podaci na dnevnoj osnovi.

KLIMATOLOŠKA ANALIZA ZA 2021. GODINU

	Januar	Februar	Mart	April	Maj	Jun	Jul	Avgust	Septembar	Oktobar	Novembar	Decembar
Prosječna temp. (°C)	2,78	5,94	5,90	9,37	14,67	21,71	23,55	21,95	17,17	9,71	6,99	3,95
Padavine (l/m2)	98,5	11,9	53,0	36,80	120,7	16,4	97,8	71,8	40,2	163,0	132,8	136,3

Najniža izmjerena temp. u 2021. godini iznosila je:	-11 °C	13.02.2021.
Najviša izmjerena temp. u 2021. godini iznosila je:	39 °C	08.07.2021.
Prosječna temperatura zraka za 2021. godinu iznosila je:	11,97 °C	
Ukupna količina padavina za 2021. godinu iznosila je:	979,2 l/m2	
Dan sa najviše padavina u 2021. godini:	45,5 l/m2	19.07.2021.
Mjesec sa najviše padavina u 2021. godini:	163,0 l/m2	OKTOBAR
Mjesec sa najmanje padavina u 2021. godini:	11,9 l/m2	FEBRUAR
Prosječna mjesečna količina padavina u 2021. godini:	81,6 l/m2	
Broj pretežno vedrih i sunčanih dana u 2021. god.:	107	
Broj pretežno oblačnih i oblačnih dana u 2021. god.:	154	
Broj kišnih dana u 2021. godini:	89	
Broj dana sa snježnim padavinama u 2021. godini:	15	

